

09/03/2002

Pantomin peristiwa Memali sandiwara politik Pas

SIK, Jumaat - Datuk Seri Dr Mahathir Mohamad berkata, Pas kini bersandiwara dalam politik apabila mahu mengadakan pantomin mengenai peristiwa Memali.

Perdana Menteri berkata, ia adalah cara Pas walaupun selama ini menuduh Umno yang bersandiwara dalam setiap tindakan yang dilakukan.

"Tapi, rakyat sudah tahu, mereka hanya berbohong untuk kepentingan peribadi.

"Sebelum ini, mereka katakan binatang sembelihan orang Umno tidak boleh dimakan tetapi pemimpin Pas yang hadir acara tertentu, tetap makan juga.

"Semuanya ini pembohongan daripada mereka... inilah cara Pas untuk memecahbelahkan orang Melayu dengan menidakkan keIslaman orang Umno," katanya pada majlis Mesra Rakyat yang dihadiri kira-kira 10,000 orang, di Padang Awam Sik, di sini petang ini.

Dr Mahathir berkata, pada pilihan raya 1959, ada penyokong Pas yang memanjat pokok kelapa untuk meminta rakyat menyokong parti itu dan kemudian menyatakan ada seruan dari langit yang mahukan orang ramai menyokong mereka.

"Pas kata itu seruan dari langit.. langit apa, pokok nyiur (kelapa) saja," katanya.

Beliau berkata ada juga penyokong Pas yang sanggup memburukkan anak sendiri apabila menyatakan pernikahan dengan orang Umno tidak sah semata-mata untuk kepentingan peribadi mereka.

Perdana Menteri juga menyatakan pengundi Sik melakukan kesilapan apabila memilih wakil rakyat yang 'ahli mencarut' pada pilihan raya umum lalu.

"Shahnon (Ahmad) berkata PM itu adalah...saya sendiri tidak boleh nak sebut, tak sanggup nak sebut depan kanak-kanak. Inilah yang dipilih oleh orang Sik. Saya harap jangan buat salah sekali lagi," katanya merujuk kepada Ahli Parlimen Sik, Prof Datuk Shahnon Ahmad.

Shahnon yang pernah dipilih Sasterawan Negara menghasilkan sebuah novel menjelang pilihan raya umum 1999 bertajuk Shit yang antara lain mengandungi perkataan lucah dan mencarut.

(END)